

26 karya menarik pada Pameran Nyawa 2015 : Burung

Medan promosi hasil penyelidikan

Oleh AMIRUL AIMAN ANUAR

kota@utusangroup.com.my

■ KUALA LUMPUR 19 NOV.

UNIVERSITI Putra Malaysia (UPM) melalui Taman Sains Putra (TSP) sekali lagi mengajurkan Pameran Hasil Alam dan Keajaiban Seni 2015 (Nyawa 2015): Burung di Galeri Serdang, UPM.

Timbalan Naib Canselor UPM (Jaringan Industri dan Masyarakat), Prof. Dr. Ir. V. Renuganth berkata, pameran itu bertujuan berkongsi hasil penemuan saintifik oleh ahli akademik serta koleksi dari sumber biopertanian untuk tatapan ma-

syarakat.

Katanya, dengan pemilihan burung sebagai tema pameran tersebut, lebih 2,500 pengunjung dijangka mengunjunginya terutama dalam kalangan peminat burung, pencinta alam dan seni.

"Pameran ini merupakan platform bagi ahli akademik dan warga UPM untuk menyantuni masyarakat luar dalam bidang pengeluaran inovasi berimpak tinggi seperti ini selain perkongsian ilmu.

"Penglibatan arkitek tempatan melalui karya mereka juga dapat disaksikan melalui penyatuan unsur seni bina dan alam yang selari dengan kejayaan universiti yang unggul dalam bidang pertanian ser-

ta flora dan fauna," katanya ketika berucap dalam majlis perasmian Nyawa 2015: Burung di UPM dekat sini baru-baru ini.

Perasmian pameran itu disempurnakan Menteri Pelancongan dan Kebudayaan, Datuk Seri Mohamed Nazri Abdul Aziz yang diwakili Setiausaha Bahagian Pelesenan Pelancongan, Nor Yahati Awang.

Sebanyak 26 buah karya oleh lebih 30 arkitek serta pereka seni dipamerkan termasuk *Malady In The Sky* yang merupakan arca origami sekumpulan burung hijrah yang membawa mesej sesuatu penyakit mampu merebak tanpa sempadan.

Sementara itu, Nor Yahati berkata, penglibatan kementerian dalam

program itu bertujuan dalam menarik lebih ramai pengunjung domestik untuk melihat dan memahami mesej di sebalik karya berinovasi yang dipamerkan.

Katanya, industri pelancongan merupakan antara penyumbang terbesar dalam Keluaran Dalam Negara Kasar (KDNK) dan pelbagai program sedang dilaksanakan termasuk yang melibatkan pihak universiti.

"Pameran yang akan berlangsung sehingga 8 Disember ini adalah pentas terbaik bagi mempersembahkan hasil kajian saintifik universiti oleh penyelidik-penyelidik UPM bagi manfaat masyarakat," katanya.



PELAJAR kolej swasta, Zarith Sofea Zamry (kanan) dan rakanannya, Shahidahtul Shamira Amran melihat salah satu karya menarik pada Pameran Nyawa 2015 : Burung baru-baru ini.



REPLIKA tulang burung unta turut mencuri perhatian pengunjung pameran yang berlangsung sehingga 8 Disember ini.



NOR YAHATI AWANG (tengah) dan Dr. V. Renuganth (kanan) melihat sebahagian daripada hasil karya pada Pameran Nyawa 2015 : Burung di Universiti Putra Malaysia, Serdang, Selangor baru-baru ini. - UTUSAN/DJOHAN SHAHRIN SHAH